

Protocol no. 82**Sezzüda da marcurdi, als 20 november 2013****20.00 - 24.20h**

Preschaints: Albert Mayer, Andri Poo, Men Caviezel, Dumeng Jann,
Marianne Werro-Lehmann e Marco Fallet (protocol)

Protocol

Il protocol no. 81 da la sezzüda da mardi, als 12 november 2013 vain approvà.

735 021**FABRICA****Swissroof; dumonda a regard cumanzamaint da fabrica**

La Swissroof ha inoltrà la dumonda pertocant cumanzamaint da fabrica ed infuormà sur dals puncts chi han impedi da cumanzar da plü bod cullas lavuors da fabrica. Il cussagl repassa la charta, redigida da l'uffizi da fabrica e fa amo adattamaints. In quella mett'el clers termins e cundiziuns, chi han da gnir resguardadas dal patrun da fabrica strictamaing. Scha quels nu vegnan accumulits schi scroud'il permiss da fabrica.

736 62**VIAS CUMÜNALAS****Punts in Val Sinestra – Zuort / preproget da sanaziun**

A. Mayer, d'eira gnü incumbenzà cul stüdi per ün preproget da sanaziun da las punts chi pendan in Val Sinestra – Zuort. El preschaint'al cussagl ils plans, tils repassa e dà las infuormaziuns necessarias.

I sun avantman duos variantas, dimena:

*Punt A e B**Stima da cuosts**fr. 1,1 miu.**Punt A1 e B**cun construcziun d'üna senda**incl. francaziun da quella**Stima da cuosts**fr. 800'000.00*

La somma d'investiziun ais gronda ed il cussagl discuta co inchaminar in fatschenda per cha l'ouvra saja registrada eir in vist'a la fusiun dals cumüns, quai causa cha quella ais fich necessaria. Ultra da quai tir'el eir in consideraziun d'integrar üna somma i'l preventiv, però pel mumaint desist'el da quai. Sco prüm vain uossa fat subit sclerimaints cul Chantun a regard üna contribuziun. Davo avair cugnuschentscha da quella vain cuntinuà culs sclerimaints a regard la finanziaziun (Padrinadi svizzer per cumüns da muntogna, pendicularas Ischgl, partecipaziun davart ils tangats da Sinestra – Zuort sco eir davart dal cumün Valsot).

Il cussagl decida da preschantar in möd infuormativ il proget a la radunanza muossond via sülla necessità e sül fat, cha seguond pussibilitats da finanziaziun gnarà ev. preschantà quel a temp ütil.

737 830**TURISSEM****Dumonda per ün fabricat provisoric / «Chilly hub»**

La Chilly hub SA, Scuol ais in fundaziun c/o. Lischana Fiduziari SA, Scuol. Davart dals signuors Andri Linsel e Ronald Jacobs ais gnüd'inoltrada la dumonda per plazzar ün fabricat

provisoric (chamonna) in Palüzot suot il lavuratori e la piazza da glatsch, quai pella d'urada dals 15 november 2013 fin als 15 da marz 2014. Il cussagl vaiva survgnì la documainta a stüdi. La discussiun demuossa chi sun da resguardar duos aspets, dimena quel politic e quel tecnic.

Tecnicamaing ais da trar in consideraziun il lö ed il spazi previs, tuot l'infrastructura, attachs d'aua e forz'electric, tualettas, parcadis, dals 16 fin als 27 schner sun staziunats ca. 60 sudats i'l schler da protecziun (WEF), il cumün sto prestar gronda lavur da rumida da l'areal previs – quai ha da succeder cunter pajamaint e blers ulteriurs puncts.

Per raggiundscher ün purtret plü cler e per sclerir tuot ils puncts vain decis cha'l schef da fabrica, la cusglia dal dicasteri turissem ed il manader tecnic salvan ün aboccamaint culs iniziants.

738 39 BASELZIA
Tscherna dal nouv caluoster(-ra)

Davo cha'l cussagl vaiva fat bun il quadern da dovairs e davo cha quel ais eir gnü consultà da las candidatas inchamin'el a la tscherna.

Il cussagl tscherna cun vusch unanima a duonn'Anita Bass sco nouva caluostera pel cumün da Sent. Ella po cumanzar la lezcha pür süls 1. favrer 2014. I's prevezza però da sclerir cun ella schi nu tilla füss pussibel d'effetuar ev. lavuors fingià a partir da subit.

Ad Anita gratulesch'il cussagl pella tscherna, till'ingrazcha d'avair surtur la lezcha e tilla giavüsch'in quella satisfacziun.

739 830 TURISSEM
Sent Turissem; dumonda da princip a regard tscherna da duonna Marianne Werro pro'l TESSVM

Marianne Werro piglia recusaziun. Ils respunsabels da Sent Turissem sun gnüts confruntats cun diversas dumondas da persunas da nos cumün, dimena scha Marianne Werro po esser impiegada dal TESSVM ed a medem temp avoir la funcziun da cusglia cumünala. L'actuar ha scleri la fatschenda ed i po gnir manzunà, cha quel fat nu chaschun'ingün conflict culla carica politica. Quai chi sto però gnir manzunà ais il fat, cha cur cha'l cussagl ha da trattar cul TESSVM, sto M. Werro adüna tour recusaziun e gnir rapreschantada d'ün oter commember dal cussagl.

740 9 FINANZAS ED IMPOSTAS
Preventiv 2014 / fixaziun dal pè d'impostas

In october vaiv'il cussagl dat la basa per l'elavuraziun dal preventiv 2014 e decis là da laschar il pè d'impostas sün 105% da l'imposta chantunala simpla. Hoz, davo avoir cugnuschentscha dal grond deficit (fr. 516'000.00) discut'il cussagl in möd vast ün ulteriura jada sur d'ün ev. agumaint dal pè sün 120%, il qual füss ourdvert necessari per megliorar il resultat. In vista cha l'on passà ais gnüda refüsada da la radunanza cumünala la proposta dal cussagl, d'augmantar il pè d'impostas da 105% sün 120% ed in vista cha la decisiun a regard la fusiun dals 6 cumüns ha lö fingià in marz dal 2014 ed in basa d'ulteriurs sclerimaints, riv'el a la conclusiun da propuoner a la radunanza, adont'il deficit manzunà, da laschar il pè d'impostas sün 105%.

741 2 SCOLAZIUN
Consozi classa pitschna integrada; schogliamaint dal contrat

Il vicecapo e cusglia dal dicasteri, Andri Poo orientescha. Tanter ils cumüns Scuol, Tarasp, Ftan e Sent exist'üna cunvegna pella classa pitschna integrada, chi regla pustüt la finanziaziun tanter ils cumüns. In connex culla nouva ledscha da scuola s'ha uossa müdada la situaziun e la collavuraziun ais latras missa in dumonda.

Il cussagl da scoula ha trattà la fatschenda e racumanda da schoglier il contrat e da tour quella fatschena via sül cumün. Il cussagl decid'in basa da quai e segua a la racumandaziun dal cussagl da scoula.

742 62

VIAS CUMÜNALAS

Jassa da colliaziun Curtin Sura Archas; lavuors da surfatscha

Cun charta dal schner 2013 vaiva Jachen Mosca ed 11 vaschins da Curtin Sura inoltrà la malcuntantezza, cha la jassa da colliaziun da Curtin Sura – Archas saja adüna obain be puolvra o lura be belma e cha fingià avant üna blerüra d'ons vaiv'üna radunanza cumünala decis da catramar la jassa.

Il vicecapo, Andri Poo orientescha. Davo il fabricat da la chasa d'abitar d'Andri Mosca ais gnü decis davart dal cumün da catramar la part a partir da la finischiun da la salaschada süsom la jassa da Curtin Sura fin e cun l'entrada pro la remissa dad Andri Mosca. Quellas lavuors vegnan effectuadas da prümavaira davo l'alguada a la naiv.

Da là a munt fin süsom la jassa pro la chasa da Jacob Linsel vain la via munida cun material da recicladi – glera da vias.

743 217.503.06

Sanaziun chasa da scoula

Infuormaziun sur dal stadi dal proget in vigur

Il vicecapo e schef dal dicasteri, Andri Poo, orientescha. Our da motivs da temp desist'el da preschantar al cussagl alchünas folias, quellas survain minchün via ordinatur. La cumischiun dal proget prevezz'ev. da salvar üna sairada d'orientaziun sur da l'ouvra, però quai stuvev succeder amo avant la radunanza da preventiv (11.12.2013). Il cussagl riv'a la conclusiun da cumbinar quell'orientaziun a chaschun da la radunanza manzunada.

744 830

TURISSEM

Via Engiadina sur Vastur / müdamaint dal plan directiv regiunal (PEB)

La via maina da l'Alp Laret – Prui – Naluns – Vastur e da là davent sül trassè da la pista Sömmi gio'n cumün. Marianne Werro, cusgliera dal dicasteri, suottametta la proposta davart da la PEB per müdar il trassè da la via da Vastur – restorant Vastur fin gio'n cumün. Il böt ais da manar al viandant ed al cyclist giò aint il cumün. Quista müdaziun sto lura gnir integrada i'l plan directiv regiunal. Il cussagl va d'accord culla müdaziun previssa ed accept'uschè la müdaziun previssa.

745

DIVERSAS SCHEFS

Problematica proget sauaziun Sent / corrispondenza davart dal büro Kindschi

La problematica dvainta vieplü gronda, uschè chi's sto eir trar in consideraziun ün proceder giuridic. La documainta vain uossa surdatta al cusgliader giuridic P.A. Vital.

54. Ski Meeting Interbancario Europeo 2014

Davart da l'organisaziun, Richard à Porta da la Banca Chantunala Grischuna, ais gnü propuonü, sco contribuziun dal cumün da Sent, ün premi in fuorma d'alch da lain, invezza d'üna somma da munaida. Il cussagl va d'accord in fatschenda. Ils detagls dessan gnir sclerits direct cul silvicultur, Mario Riatsch.

746

ORIENTAZIUNS

Preavis infuormaziun davart la Swissgrid, 10 december 2013, 13.30h a Zernez. Da quai vain tut cugnuschentscha. Il vicecapo, Andri Poo, rapreschantarà al cumün da Sent.

Charta da s-chüsa davart dal TESSVM a la populaziun da Sent / surdatta da las lavuors pellas localitats da l'agentura da Posta e dal Turissem / object Posta Sent

Il Capo orientescha supr'il rebomb e las reacziuns negativas davart la mansteranza in connex culla surdatta da las lavuors davart da la TESSVM in nom dal cumün. El preschainta la charta previssa dal TESSVM, chi cumpiglia la s-chüsa pella svista a la mansteranza ed a la populaziun da Sent. In quel sen vain la charta publichada prosmamaing. Il cussagl va d'accord in chosa.

L'actuar:
Marco Fallet

Il Capo:
Albert Mayer